

【渡阿依食飯】張美容原作

逐年差不多討到位母親節遐下，即會睭著恁个文章，內底个意思係講：「偲人細漢遐下，食飯食到一頭一面、滿哪位舞到狼離狼犁，爺哀毋會拈嘛毋會罵，好心好性教偲人擎箸、撿擎；學行遐時，爺哀毋盼得偲人跌倒，背痾痾牽偲人个手，教偲人學企燈、學徒步，攏毋驚麻煩、毋驚辛苦。這嘛爺哀多歲啊，手腳無恁靈通，有時食飯个時務飯粒直頭跌¹，行路个時即輒輒跌倒，做子女个愛多加一兜仔耐心拗佢鬥相共，毋好棄嫌佢、責備佢。」見睭著恁个文章，偲个心肝內即有淦淦个感動，目珠眶硬討紅起來。

偲依今年九十歲啊，情形和文章內底寫个共款共款。前幾下年猶會煮飯、供頭牲、做版，這兩年睭佢虛落去，出門愛坐輪椅、食物件像掣秧、和人講事總係人講東佢應西。睭著這種情形，偲兩姊妹無麼个敢渡佢出去食飯，一來嫌麻煩，二來驚餐廳个頭家無歡迎，所以逐擺渡佢出去寮，討晝即買一兜物件隨轉屋下食。

一直到有一擺，偲聽阿弟講佢一儕渡阿怙、阿依去石門水庫寮，順續在遐食當晝，遐日堵好拜六，餐廳人客真多。阿弟輪流撻坐輪椅个阿怙、阿依落去，偲聽著黏時問：「頭家會無歡喜無？」告知，頭家娘毋單無嫌佢人人少又礙著人，猶一路喊大家閃開兜，留一條較闊个路得佢人過，頭感心个係，頭家娘又推一個窗門睭會著湖景个位得佢人坐，偲心肝內想，頭家娘定著係得偲弟个孝心感動。偲知差啊，「孝心」係美德，人睭你對爺哀恁有孝，安謐即有，仰子會得人感！

想著成過和爺哀共下出去食飯，講做陪佢人食飯定，和佢人答答嘴鼓、答訛答訛，真自然。這下無共款啊，毋係陪阿依食飯，係講做渡阿依食飯。食飯遐下，阿弟驚阿依食到歸身，拗佢个胸前圍一條手巾；驚阿依食傷少，密密拗佢挾菜拐佢食；又驚阿依淋湯哽著，一湯匙一湯匙款款子餉佢；猶愛一下一下拗阿依黏在嘴角个飯菜撿莫、粹淨。睭著恁个情景，偲黏時想起母親節遐篇文章，無毋著，這下阿弟做个，即係以前阿依一一為子女做个，做子女个仰子會用棄嫌爺哀！仰子都毋會用推懶！

¹ 直頭跌：音 chid` teu` deed`；紛紛掉落。

108 年全國語文競賽客家語朗讀文章教師組（詔安腔）

編號 02 號

【圍牆脣个黃梔】彭瑞珠原作

學校个圍牆脣有一頭黃梔，得人種在小型焚化爐脣。大樹會遮著佢東片裡个日頭，比人較高个圍牆又籬在佢个西片裡。所以，佢个日照無真足。好佳載，泥下个泥肉賁，佢个生命力又強，佢即逐日躋圍牆个高度愈生愈高。一陣春分个大雨過後，佢猶拚命伸枝出葉，開出雪白个花。

「唔，真香哦，係黃梔！佢頭恰意个花。」渡學生去拚掃个佢，用手鬥掃樹葉，頭幹俛黃梔，鼻空鼻著遐花香，歸下無想討徒步，圍牆遐裡猶有滿天个紅霞。

第二日晨早入教室，仰子鼻空猶鼻會著遐花香？啊，毋係佢想傷多，係佢事務桌嶺排到淦淦个花。一來花香錫人，二來佢會擘心圍牆脣遐頭黃梔，害佢心肝嘎嘣嘣跳、嗶嗶掣。毋過，佢猶係軟聲問：「麼个人咧？係麼个人拚恁多花送得先生係無？」歸間屋个學生，驚係得佢歡喜又攔擘心个聲嗽弄到哈哈大笑。

「先生，你臆啊，你臆睭望啊！」

阿文？阿俐？毋係，係阿航！阿依哦！係遐上課尋無人，下課創治人、臭銃、屋下又亂，歸學校都無奈佢何个阿航！這擺正

經死啊！遐頭靚靚个花樹，定著即溜皮溜梗，伸無半條命啊！難怪，昨日討暗，阿航共款無去拚掃，猶不時在佢脣頭跳上跳落。

毋過，佢猶係細義感謝：「勞力你哦！」心肝底放毋會落心，又試探問佢：「你哪位來恁多个香花咧？」

佢難得在教室企到正正，歡頭喜面、真得意應佢：「你毋係講，你頭恰意這種花？佢屋下真多哦！嘻嘻，佢媽講，討送得先生哦？去拚，去拚，煞著拚！你猶愛無？韶日，佢攔拚得你！」

帶著亂雜又略略燒暖个心情，佢望遐一桌个雪白，睭向佢：「勞力你，勞力你送得先生，恁香个花。」遐日个花香，佢攔會記得，共下，嘛會想起圍牆脣个黃梔。雖然，佢个生存條件無好，毋過，佢人嘛有佢个單純雪白，猶會分享花香得人。

【幸福】李幸妃原作

麼个係幸福？仰子正算係有福氣？你識感覺著幸福無？

佢記得有人恁講過：「假使你有一粒蘋果，佢嘛有一粒蘋果，佢相換這兜蘋果，恁隨人猶係正有一粒蘋果。毋過，假使你有一種想法，佢嘛有一種想法，佢人相交流這兜想法，恁隨人个心即會有兩種無共个想法。」

在教學个過程內底，真愛嘛真慣勢和細子分享生活个點點涿涿，可比講：這站時間聽著个笑事、出去賞寮个時睺著个心色事，分享讀著一本好書內底个一句好事，抑係現時社會在時行麼个這兜；漸漸細子人嘛會在下課个時，走過來和佢講心肝事，聽望佢个想法；無定著會鬥相共著麼个，有時佢正係做一個無聲个聽眾定！記得有一回，一個微微笑个妹子，恬恬行俛佢个臉身脣，細細聲問講：「先生，你敢知麼个雞走頭緊？」佢想來想去，睺睺這，目頭結結應講：「敢係火雞？火雞走真緊哦！」佢講：「毋著！毋著！毋係火雞，係麥克雞！因為『麥克雞塊¹！』『快』即係緊啊！著無？」聽了兩儕笑到哈哈嘍，笑到愛攬

食肚！有影啦！細子人个想法直接擱單純！遐時，佢感覺幸福即係分享。

逐擺到當晝歇睏，同事定著會留佢在學校作埕食！毋過，佢總係笑笑回講：「勞力啦！佢轉去屋下食！佢依會等佢轉去食！」轉屋下和序大人作埕食飯變做這幾下年頭福氣个時務。頭尪个阿弟無在啊个事實，得佢苦感無把扼姊妹子作埕个時間，愛加關心、加注意，愛加講幾下句事！屋下好定泥个恬靜，正知兄弟姊妹會冤家、相爭、相罵、受氣，幾時嘛係一種福氣！睺著遐桌嶼阿母煮个飯菜，雖然毋係麼个山珍海味，正係簡單个煎魚、炒薤菜和番薯飯定，毋過食落食肚底，嘎係甜在心肝頭，猶會用坐作埕食阿依煮个飯，遐係一種福氣个味素！

佢對幸福个想法，跨年歲越大越改變，跨經歷个事情越多越寶惜。佢愛个幸福真簡單。逐日晨早目珠擘金，睺著日頭照對窗門入來，日頭光走入來和佢講勢早；啟一下大氣，感覺著猶活个个歡喜；圍牆脣遐頭木棉樹，柑子色个花蕊跌落泥下，若像拗大地鋪一領柑子色地毯，遐落花有落花个靚；臥頭睺天，雲在走相掠，鳥在汨相尋，感覺著世界在停動个節奏。幸福愛用心去體會，用心去感受，心肝底有愛、恬有感恩个心，幸福即係恁簡單。其實做一個知足感恩个人，逐日擺會係福氣快活个，擺會用享受著福氣个好味素！

¹ 麥克雞塊：音 ma kied' ge' kuai'；麥克雞塊，諧音麥克雞快。

【你个抑係偈个】劉玉蕉原作

人在世間，短短幾下十年，萬事萬物，時時在變，日日換款，麼个係你个？哪個係偈个？等你雙手一放，氣脈一斷，做一下係天公个。遐兜你毋盼个，過去嘴面上恬恬講个「偈」，到這時做一下變做「識」，像雲、像煙，過去啊，無留半點蹤跡啊。

遐日，載阿嫂去山嶼歇涼，車行過遐片，偈識拗號做「偈个山」个山林，遠遠望過去，大樹猶係高天天，青葉弓弓，哪頭係柿子樹？哪頭係梅？目珠一瞞即轉濛啊！正知講，這下遐草蕪得老虎會藏个。阿嫂問：「討落去睭睭、遶遶無？」偈應佢：「傷心所在，莫睭較贏！」事講出一半，車底个空氣一下即結凍啊！車緊行，兩儕恬恬，想个係共條事，想个係像煙、像雲个「偈个」。

家官興種蘭花，傳到丈夫，共款恁愛。普通時上班以外，摸花、顧花个時間占去大半。有長錢，心心念念即想討買一垵土地來搭花園。田地、山林、沙埔，遶過真多所在，臨尾，相準天冷个好地理，陽面山連平平个旱地。真錫人个係合界遐條坑，淨俐个坑水長年流無歇，白鶴花排列个樣，企在兩裡，開花時務即像

白色个蝶，歇在坑脣葉面，風一吹，撲啊撲，即撲到人个心肝內底去啊。淡淡个花香，錫人鼻空，像賞點膨嬰个細子人，無注意著即撞你一下，得人有期待、有歡喜。

歇睏日，偈歸屋下人打早即出門。食个、賞个、做事个傢伙頭款款便，一臺車即堵好尖淦淦，準遊山賞水，款款駛上山。山風涼涼，坑水清清，細子和丈夫鬥相共糝泥做礮塍，想討做一個細個魚塘來供魚。汗流罅啊，即係佢三兄弟奈个時間，捉魚賞水，打草蝨、攀籬跋壁……，賞到貶過來。橋下个大石頭係偈个洗衫枋，鞋一脫，屎肫一頓，即真有樣啊，衫褲掙啊掙，得人想著成過老屋後背遐條大水溝，水共款鮮鮮，掙衫褲个動作嘛共款無變，正係細支手變大支手，偈嘛係三個細子个阿依啊！

好光景過無兩年，栽柱搭棚正舞好。壞啊！921 大地動一搖，山崩地裂，走山走到無款，進前真錫人个山坑水，做一下戇面到麼儕都毋識啊。細坑子變做大條溪，隆隆呷拚對下脚个山坑水，拗歸個旱地切做兩裡，正伸澄澄个樹林，和山下一條車路。白鶴花遐迎風展開个笑容咧？無啊！細子、大人用汗水換來个魚塘、花園咧？跔水走啊！歸火灶遐時留在山林內底个笑聲，跔風，流流去啊。遮影个大樹知，偈這兜「識」在這跡位歡喜過。

麼个係你个？要緊無？水一沖，火一燒，做一下變做回憶，你搭著麼个，無啊！

108 年全國語文競賽客家語朗讀文章教師組（詔安腔）

編號 05 號

【蓮霧樹下個花園】羅紫云原作

佢屋下個屋角頭，有一頭蓮霧樹，有三十外歲啊。樹身真旺，有青拚拚個樹葉，逐年舊曆五月時即會開花。毋過，毋識打有蓮霧好食，實在怪奇！屋邊講佢係半公嫵，會開花毋會結子。雖然無收成，毋過蓮霧樹即像一支青色大雨傘，樹下涼涼，係一個真靚、真好歇涼個所在哦！

佢在遐頭蓮霧樹下，種有真多種花草。有愛陰涼，無佻意炙日頭，無愛傷多水分個「多肉植物」，像油蔥、佛珠、白牡丹、水芙蓉、海芋、藤類這兜。有個吊在樹極岫，有個順樹頭下排做一個圓。若愛沃水、愛日頭炙、會開花個花種，像燈籃花、喇叭花、打碗花、蘭花、玫瑰花、宜梧、鼠麴草、繡球花、蓮花、芙蓉、蓮蕉花這兜，即排到外緣做第二個圓。有一兜佢知名個，有一兜佢毋識個，總講一年四季有無共款個花開，得人欣賞、睭靚。

這個同心圓個花園，係佢個好朋友。遐毋係正花園定哦，嘛係一個細細個動物園，有鳥、蚊、蝶、蜂、蚌蛻、田雞婆、蜈子，猶有逐日晨早、暗頭，攞愛拖一撮飼料飼佢個——魚和田

螺。魚、田螺供在蓮花鉢內底，佢人個組合即係現時真時行、真熱門個「魚菜共生」。魚食蚊，田螺食垃圾，淨化水質，蓮花個養分即對魚和田螺來，係真環保個方式哦！

屋下事做煞，若有閒，即會去花園，擲草、捉蟲、沃水、欣賞花、睭魚，和遐兜花花草草講事，摸遐摸這。這係佢逐日歡喜、甘願愛做個快活頭路，毋管透風落雨，攞一定會去遠遠睭睭個所在。尤其係擔一張凳，坐蹠睭魚，睭遐魚屎舐扭啊扭，無擘無心，自由自在，歡歡喜喜個樣。佢個心即開，歡喜得天，一身個恹嘛即消無去啊。

成下猶會渡屋邊、朋友共下來參觀佢個花園，作埕答嘴鼓，共下研究推廣「魚菜共生」個做法哦。人多，意見多，想法嘛多。佢接受大家建議，慢慢規畫、改進，加幾下粒醃缸做第三個同心圓。醃缸內底供南洋鯽，面上種青菜、瓠瓜。有人客來，菜即便便啊！雖然這個花園細細，毋過這滿變到真齊正、真靚哦。

108 年全國語文競賽客家語朗讀文章教師組（詔安腔）

編號 06 號

【毋會枵个阿依】曾菁怡原作

睭著歸桌錫人个料理，炒肉、封肉、豬腸炒薑絲、油湯炆筍乾，猶有佢頭愛食个菜脯卵，遐香噴噴个味素即得人口涎水溶溶汀。

「阿依，緊來食哦！」佢拄毋會核先拈一坵炒肉圓入嘴。

「你人先食，佢猶毋會枵。」阿依猶在燒滾滾个灶下無閒挾掣。阿依个手路真好，歸桌个飯菜黏時即得佢人食到淨淨。

食飯飽，阿依總會切一盤果子得大家食。

「阿依，共下來食啊？」佢喊行出去个阿依。

「你人先食，佢猶飽噎噎。」阿依笑笑應佢。

逐擺攏恁，若有煎魚，阿依攏會講：「佢愛啣魚頭，遐留得佢即好。」若有雞肉，阿依又係講：「佢愛食雞爪，遐留得佢即好。」若有雞卵糕，阿依又會講：「佢無愛食甜，你人食即好。」阿依總係食恁少。自細，佢毋識聽佢喝過食肚枵。

逐擺有錫人个好料，阿依恬恬即講：「你人先食，佢猶毋會枵。」無即係講佢食無恁多，喊佢人煞煞食莫，毋使留得佢。佢人嘛正經戇戇相信阿依食毋會落，自家拚勢食到肚飽飽。

等到自家做阿依，後生、阿女講愛食麼个，佢就拚命變出來；人講哪位有好食个，佢就撥工走去買轉來得佢人享受。心肝底總係掛心後生、阿女愛食麼个？敢有食飽？會枵無？睭著佢人食到笑嘆嘆，佢即感覺心滿意足，食肚飽啊。幾時，毋會枵个阿依係因為子女滿足个笑容，係因為對子女个寶惜，係恁重个親情啊！

想著阿依成過總係坐在脣頭，睭佢人像八爪魚拗飯菜划淨淨；想著阿依逐擺對市場轉來，總係攏著佢人頭愛食个四秀，自家嘎無麼个食；想著阿依切好歸盤个果子，自家罕得提一坵來食。佢个鼻好定泥感覺一陣酸酸，目珠茫茫啊。阿依毋識講佢有幾惜佢人，毋過佢个行動早即表示頭偉大个母愛啊。

這滿現時，阿依个牙無好，背痠痠，腳手嘛較慢趁啊，佢猶係慣勢坐在脣頭，溫柔講：「你人先食，佢猶毋會枵。」佢心肝底幾毋盼，阿依到老猶係驚佢人食毋會飽、毋罅食。

好得，佢毋會攏戇戇相信阿依食毋會落啊，佢牽阿依个手坐俛來，拗佢講：「阿依，佢愛共下食正會有好味素哦！」

108 年全國語文競賽客家語朗讀文章教師組（詔安腔）

編號 07 號

【尋轉火焰蟲】廖惠貞原作

講著火焰蟲，即會想著成過，遐係做細子時頭靚个回憶。猶細漢時務，阿媽不時會渡細子念：「火焰蟲，唧唧蟲，楊梅樹下吊燈籠。燈籠光，照四方，燈籠暗……」暗頭，大落屋个細子人洗好手腳，即擔細張凳、攬草蓆到禾坪，又賞又念嘴貶。有時阿媽、阿太擘地豆，偈人提地豆莢夾耳子，做耳勾戴。

細漢舅會渡一陣細子走去菜園田脣，捉一瞞一瞞个火焰蟲賞。阿媽即會牽大嫲聲喝：「外頭暗摸摸，較緊轉來啊！毋好弄火焰蟲啦！佢嘛係一條命！」一陣人走轉禾坪下，賞踢銅笏，賞點妖精。火焰蟲嘛會飛到禾坪下！較細漢个細子會睡在草蓆面上念：「月光華華，阿妹煮茶……」算天嶼滄滄个星，孤老个叔婆太又喊：「毋好比月光！會得佢割耳子！」

去臺北讀書，好朋友蹣在大溪烏嘴山嶼。生物先生識渡偈人盤兩座山去採集。山嶼無揸電，伯嬭猶點蠟燭煮飯，暗頭嘛點蠟燭討論，火焰蟲飛入廳下來鬥鬧熱。先生講：「山嶼無電、無光害，火焰蟲正會用生存！」有一擺和朋友興趣趣去山嶼尋佢，嘎無堵著。毋過嘎得烏昏滿山滿坑个火焰蟲驚著，正經「滿山塘樹

邊，飛光千千點」个景色。一大片金金像天嶼个星跌落來，又像樹嶼開个一蕊蕊金金个花。兩儕睭到呆去，行這輪，正經價值啊！

識和小朋友講起「火焰蟲」，真多人無睭過，講著《火焰蟲个墓》即知啊。遐係日本宮崎駿先生个動畫，14 歲个阿哥和 4 歲个阿妹在美國空襲時失去阿依，兩姊妹去靠親戚，落尾蹣在山窟生活真苦，毋過暗夜會用睭滿天飛个火焰蟲。阿妹因為營養毋罣死去啊，真苦憐哦！嘛識聽朋友講去澳洲參觀峽谷內底个火焰蟲，坐細隻船个時人毋會用發出聲哨，嘛毋會用翕相。臥頭睭起去，成千成萬个火焰蟲密密歇在峽谷面上，像歸片个寶石發光，逐儕都睭到嘴擘擘。朋友對佢人用心寶惜火焰蟲个心足感動！

真久無睭著火焰蟲啊，成過莊下暗夜一瞞一瞞个身影，幾時會用睭著大溪、澳洲、《火焰蟲个墓》个火焰蟲隨來歡喜和心酸。偈頭思念个猶係田寮莊下，竹籬圳溝脣个火焰蟲，遐時會用尋轉火焰蟲，尋轉無擘無心个童年。

108 年全國語文競賽客家語朗讀文章教師組（詔安腔）

編號 08 號

【雞肉菇】張捷明原作

「啊！雞肉菇哦！俚來擲。」

「毋使恁攔緊！等佢大，當晝正來擲。」

山嶼有真多好食个物件，毋過有一件單單山嶼人自家享受，街路人想討食毋若買無，係根本即毋知有這款好物，這即係雞肉菇。山嶼人有供雞，毋過無年無節無劇雞，雞肉菇即係普通會用食著个免費雞肉。

若講松露係法國人「灶下个鑽石」，雞肉菇即係山嶼人个「桌心」。這係頭珍貴个一落菜，正經个山珍。

雞肉菇有兩種，一種係大蕊个，一跡正生一頭，像係單丁。另外一種係細細蕊，一生即歸大片，像歸火灶共下幾下十蕊，號做姊妹菇。兩種各有特色，共款恁難尋、共樣恁好食。

雞肉菇生在竹園、樹園、草墩下，睺著這種上天賜得俚人山嶼人个美食，即像得著獎，遐係氣運，撥工去尋嘛尋毋會著。毋過，毋係見樹園即有，猶愛睺時睺刻、睺天氣。燒暖个天氣加上落過雨水正會生，半晨早即鑽出泥面，俚晝時正開傘，像一枝歸身牙白色个細枝雨傘，到下晝一兩點即過磅。所以頭好个採收期

係俚晝時，傷早無額，傷晝又過磅。

所以這種山珍毋會用因久，愛趁萋萋提來炒菜傍菜，尤其係煮竹筍湯，嫩嫩滑滑擱清甜。愛當日享受，無法度保留隔頓、隔日。

俚熟事一個農務局个雞肉菇專家——宋先生，佢講這係現代科技無法度用人工培養个菇種，因為遐愛共下有幾下種關鍵條件：第一係泥下一公尺愛有白蟻藪，第二遐位愛有菇菌，第三有白蟻藪和菇菌，猶愛有一種微生物做媒人，擱來愛氣候溫度和堵好个水氣。這兜條件，人工猶無法度解決，所以猶係正有山嶼人自家享受。

猶有一個問題，恁軟恁滑个雞肉菇，愛仰子對恁有个泥下一公尺鑽上地面咧？幾時菇面上有一點比鑽石猶較有个尖頭——幼幼个生長點，負責鑽泥。

雞肉菇仰子會號做雞肉菇，當然係嫩嫩滑滑擱清甜，菇嶼比雞髀猶較好食。猶有一件係雞肉菇个菇柄，菇柄其實無菇傘恁滑，毋過菇柄擘開了後係一絲絲个肉絲，食起來正經像麥當勞个雞肉絲。

俚少年在山嶼遐時務，食過真多雞肉菇，所以真思念這山珍土產。見擺轉山嶼即會尋，毋過，毋知係毋係這滿酸雨傷多，造成生態失去穩定，和留在山嶼个朋友都講真久無食著啊。

108 年全國語文競賽客家語朗讀文章教師組（詔安腔）

編號 09 號

【桂花香】邱坤玉原作

人企得正，得人惜；花開得香，正會得人愛！毋過「樹愛軟枝，人愛硬直」，正有道德！

阿怙頭愛桂花。在美濃老屋个門口種有一頭桂花樹。遐桂花單一枝極，直直大到像偈恁高，歸枝樹極企到澄澄，極頭大討有偈个腳囊肚恁大支。

聽講樹骨企到澄澄个桂花樹，價數頭好。所以，阿怙拗桂花照顧到越來越高，身材越來越靚，葉越來越勻，到偈讀國中个時，想討拊花，猶愛跟腳尾咧！

坐在花樹下，引起偈个注意，遐樹極面上暴出手指尾尖个花蕊，桂花散出久久遠遠淡淡个蜂糖味。桂花會恁得人惜，實在係因為桂花个蜂糖香味，雖然淡淡，毋過香味真遠，擱耐香；遐係因為桂花卵黃色，雖然淡淡，毋過像黃皮膚，真靚，擱耐睭！

這頭桂花樹受著特別个款待，阿怙愛偈拗樹頭个四角輪轉清淨俐，若無，斃去个樹葉會害樹頭生菌，燥去个樹極愛鋸莫正靚，樹影下有發出來个樹秧愛徙走，無身分个雜草即愛擱得佢淨，毋會用儘採濫糝。等到清淨啊，愛用細細版个紅紙，拗遐頭

桂花樹圍到紅紅，猶愛貼五福紙，對年三十起，逐日晨早暗夜愛燒香，年尾拜到年初。

偈知佢个花期短短定，恰意桂花个「色」、「香」係一種精神上个安慰，係時間在遐流轉，漸漸走色了後，正發現个靚！係佢淡淡个香味，毋會和玉蘭花、七里香爭排名；細細圓圓个花型，黃黃白白，佢毋和牡丹花、燈籠花爭大細；簡單到嘛無像蘭花有錦霞樣个線條。阿怙認為，遐桂花係頭得人尊敬个君子。

親像宋朝李清照在詩內底有形容淡黃色个桂花，暗淡輕黃、體性溫潤，色淡香濃，在讀書人心肝底係百花个第一流。君子立身處世，恬靜安定，毋惹人注意，正留香味在天地。毋所像大花紅激激，招來蜂蝶惹身傷性。

偈嘛信神，逐晨早暗夜愛燒香。打早起來，係拊一盤桂花來拜灶神；討暗時，即係拗遐盤桂花提來煨茶，泡出來个桂花味鼻起來真溫和，花茶色清淡，食著順嘴。恁踈阿怙虔誠用桂花拜灶神，一直拜到阿怙百年歸仙過後。

這頭桂花樹嘎因為路做闊，得粗暴个怪手和無知識个工人，少一份耐心，毋肯先來斷根，少一份軟心，毋肯真心相惜。無想遐花鬧青蔭、薄皮細肉个桂花，仰子有能力去抗議，去講佢个傷疾？硬硬得遐怪手拗佢強制摟開，所以無法度擱活起來，嘎來燥去，正經真無採！難怪花樹會艱難心疾，艱難到死。

108 年全國語文競賽客家語朗讀文章教師組（詔安腔）

編號 10 號

【回禮】賴維凱原作

本底討回收个大紙袋，嘎睭著內底猶園一細埕月餅。算來這年歲比佢猶較少年个同事，敢會知麼个號做「回禮」？心肝頭湧出一陣燒暖燒暖。猶細漢遐時，阿依見擺擺燒滾滾个鉢得阿公、阿媽，後次回攞過去收个時，鉢內底總係重鈦鈦。毋係進口个糖即係餅，毋係干貝即係福神漬，逐擺都無麼个共。佢見睭著鉢一提轉來，即會想討打開來睭。毋過，若手一伸出去，定著即會有箸頭推過來。所以攞會乖乖等阿依無閒遐這過後，正跔阿依打開來睭內底有麼个。鉢逐擺毋係得阿公粹到淨淨，即係得阿媽粹到燥燥，內底即係為著愛園一兜仔戇想。

「回禮」，毋係正「回禮」定！自細到大漢，係「浸」在這內底个生活，總係體會出來。毋過，這內底个人情世事、遐遐這這，無定著，嘛寫毋會出來，嘛係佢人這緣个少年，仰子都無法度「答」出來个……。

晨早時，阿依去睭過「文光哥」了後，目紅鼻紅，拗佢講佢毋識睭過个阿伯仰子歹命，因為得著糖尿病，這下又青瞑啊。佢感覺奇怪，這個阿伯鬥底係麼儕？了後正知「文光哥」係大舅嬭

在臺灣遐睭子，一等照顧佢个好朋友。佢心內底想：這和阿依有麼个關係？嘛無聽過大舅嬭有特別交代，喊阿依去拗佢睭這個朋友，算起來係無麼个熟事个人。暗頭，阿依著面擺重鈦鈦个營養品和面上寫有葡萄牙文个箱子，著面喊佢拗佢抄一下巴西个地址，佢討寫批得大舅嬭。

阿怙對外頭正轉來，即得阿依吩咐去買寄航空个批橐。佢一聽著即在門口直直唸：「又毋較早講，今嘎起風啊，又落恁粗个雨，喊佢愛仰子買？」阿怙普通時即真會和阿依「應嘴應鼻」。「毋會著雨衫哦？麼儕會知你頭下去哪位啊？喊你買即去買！猶恁多麼个好講个？」照阿怙普通時个性地，佢臆佢聽著恁个事，定著拄毋會核。無想著佢即無攞應啊，雨衫一著，引擎騎个即去買啊！

大舅嬭自阿依著癌了後，長久以來，即一直寄營養个得佢。即算大舅過身恁多年啊，嘛共款定期寄來，無一擺拗阿依算過錢。啊！「文光哥——大舅嬭——阿依——文光哥」，佢做一下想通啊！毋使臆嘛知批內底會寫麼个啊！毋使問嘛知阿依仰子會去睭文光哥啊！批橐面上，佢款款子寫，寫毋著，扯莫，攞寫！寫無靚，扯莫，攞寫！

【供蜂个人】李秉璋原作

「來哦！來買蜂糖¹！來買蜂糖哦！蜂糖無純，剝頭²！」這係一個真舊真久个笑事。剝頭，毋係剝生理人个頭，係剝蜂个頭。這雖然得人感覺好笑，毋過即講想討買著百分之百純蜂糖無恁簡單。市場面上有真多假个蜂糖，有用果糖去叟³，有用糖飼蜂⁴，真多齣頭⁵。這即講蜂糖係真寶貴嘛係真貴个物件。尤其係這幾下年來蜂死真大陣，得蜂糖个價數愈來愈高。毋過供蜂个人嘛真擘心蜂若死恁多，佢人嘛會無蜂糖好收。

供蜂个人若像「游牧民族」，一年透冬愛滿哪位走。花在哪位，佢人即在哪位。冬尾个油菜花田，三、四月个荔枝花開，接落來換牛眼花開，佢人攞愛躡花在徙，哪位有花，佢人即躡去哪位，愛上山嘛愛落平洋。攞鴨个人攞幾下千隻鴨，毋過供蜂个人手頭係幾下十萬隻、幾下百萬隻个蜂。手握百萬軍以外，猶愛有得蜂叮个心理準備。

供蜂人係一代接過一代，在阿依个食肚內底即躡阿依在供蜂。荔枝花和牛眼花開个時，即係頭無閒个時，愛日加夜做事，

拗蜂糖收起來。一箱攞一箱掀開，拗蜂藪提出來打蜂糖⁶，三百箱个蜂箱會用收五、六鐵桶个蜂糖，一桶大討有五百斤，毋過一年頭望嘛望這時。歸屋下个人做一下攞調來鬥做。序大人這時即會講：「做事腳手愛好，腳手若預顛⁷即做無食。」收好个蜂糖和傢伙頭嘛愛收起來園。所以愛特別起一間倉庫來園，得蜂糖有一個好所在。

寒天時，蜂無物件好食，這時務即愛用花粉抑係糖提來供蜂。供蜂个時，頭戴套網个笠婆⁸，著長衫、長褲、長笊鞋。到位供蜂所在，先拗樵園落煙罐⁹。起火了後，手戴手橐¹⁰提煙罐，掀開蜂箱蓋，手壓¹¹煙罐，用煙罐个煙攞蜂。攞來拗內底一片一片个蜂藪提出來檢查，睜望有蜂王無，若過頭多即愛拗頭強个留落來。頭驚即係連蜂王攞死去，這箱个蜂即毋食物件，做一下無效去。蜂箱內底蓋若有結蜂蠟，即愛拗鏟起來，拗蜂箱整理整理，得蜂有一個舒適个藪。鏟起來个蜂蠟，會用提來食，食起來像樹乳糖¹²。有時務蜂箱內底个蜂傷少，猶會有蟻子來食糖和蜂蟲，有時攞會有人來偷提蜂箱，這兜攞係供蜂人頭掛心个。顧蜂即像顧自家个細子，驚佢寒、驚佢無食个、驚佢破病、驚佢得蟻子欺負、驚佢得人偷。直直擘心到明年春天，遐香香甜甜个蜂糖即係得供蜂人頭好个禮物。

¹ 蜂糖：音 pungˋ tongˋ；蜂蜜。

² 剝頭：音 dogˋ teuˋ；砍頭。

³ 叟：音 teuˋ；摻雜、沖泡稀釋。

⁴ 飼蜂：音 ci pungˋ；餵食蜜蜂。

⁵ 齣頭：音 chidˋ teuˋ；花樣、方法、手段。

⁶ 打蜂糖：音 daˋ pungˋ tongˋ；將蜂巢片放入採蜜機中採集蜂蜜。

⁷ 預顛：音 ham meen；做事笨拙。

⁸ 套網个笠婆：音 to miongˋ e libˋ pooˋ；用細孔密網從斗笠上頭直套下來至上半身，保護頭、臉、脖子等不被蜜蜂叮。也有人製作整件的防蜂衣。

⁹ 煙罐：音 rhenˋ guanˋ；噴煙器，用來驅趕蜜蜂，避免蜜蜂叮咬以方便工作。

¹⁰ 手橐：音 shiuˋ lobˋ；手套。

¹¹ 壓：音 edˋ；壓，指用手壓煙罐的風鼓使噴煙。

¹² 樹乳糖：音 shi neenˋ tongˋ；口香糖。

108 年全國語文競賽客家語朗讀文章教師組（詔安腔）

編號 12 號

【漕垃圾】林伯殷原作

逐日討暗六點空，清潔隊歇暎日以外，偲个隔壁屋邊即會擱大包細包个垃圾行出來，企在大路脣等垃圾車。等到車隊駛俛啊，大家即真熟手拗垃圾漕入行頭前个垃圾車，正擱斡身拗壞銅壞鐵交得後背个資源回收車，雖然，大家對漕垃圾早就十分熟事，毋過，三不五時猶係會睭著有人擱著垃圾在大路捎垃圾車，遐暎子，實在毋知係愛笑、抑係愛嘍，總講，大家一日過一日漕垃圾、清潔隊一日過一日收垃圾，討暗時愛漕垃圾早就變成大家生活个一部分啊！

漕垃圾和用水、電、瓦斯真誠成，係重要个公共事務，順順个時務，人無幾知，若停收幾下日，遐事情就大條啊！像成過有一兜所在个垃圾無位好漕，清運發生問題，滿哪位垃圾囤囤个，黏時即變成當地个重大事件，就算地方首長從上從落¹暫時來解決，過幾下年又嘛可能擱來發生，垃圾問題強強變成地方發展个陰影。猶有人个天性就係人人會生產垃圾，同時，逐儕又無愛垃圾，遐垃圾討漕去哪位？起頭下，各地大討係尋較偏僻个所在來

埋垃圾，過後，埋个所在愈來愈難尋，加上垃圾愈來愈多，各地即起焚化爐來燒垃圾，垃圾燒過後，量少去真多，毋過，空氣污染、爐灰清運等別件問題又跔啊來，講實在，處理垃圾無恁快，就算現時个技術比成過進步恁多，猶係難做到十全十美，其實，猶係愛大家發揮公德心，共下來少漕兜垃圾正係頭好个解決辦法。

愛仰子正會用少漕兜垃圾呢？基本上，愛做到儉用和資源回收兩件。儉用就係少用兜、毋好打爽，和客人「省儉」个精神共樣，該用个正用，該省个就省，比論講，出門自家扞茶、扞碗箸，買物件自家隨袋，儉用兜，垃圾自然就會跔著少啊！續落就係愛做好垃圾分類、資源回收，做回收就係「惜物」，毋好折福个意思，拗紙、鐵、塑膠、玻璃等等會用擱利用个物件收起來，送轉工廠重新變做原料，垃圾經過回收後，定著會減少真多。

處理垃圾毋單係政府个責任定，嘛愛逐儕共下用心來配合。好佳載，臺灣有真多民間團體真打拚在遐鬥相共宣傳垃圾減量和做資源回收，恁多年落來，關心垃圾問題个人嘛愈來愈多，總愛大家有心來少漕兜垃圾，相信偲人个環境就有機會越變越好。

¹ 從上從落：音 zong` shong` zong` loo；忙上忙下。